

Masfjorden kommune
Austfjordvegen 2724
5981 MASFJORDNES

Adm.enhet: Forvaltningsseksjonen i region
Vest
Sakshandsamar: Kari Morvik
Telefon: 90734161
Vår referanse: 17/5803
Dykkar referanse: 17/178
Dato: 27.04.2017

Att:

Uttale til Masfjorden kommune Hordaland - Dispensasjon frå kommunens arealplan - etablering av oppdrettsanlegg ved Ytre Raunholm

Vi viser til oversending datert 06.04.2017, motteke i Fiskeridirektoratet 12.04.2017, med søknad datert 03.02.2017 frå Erko Seafood AS.

Ut frå vår kjennskap til området, det marine miljø, fiskeriaktivitet og søkjar sitt behov for ny lokalitet, vil ikkje vi gå imot at det blir gjeve dispensasjon for etablering av akvakulturanlegg som omsøkt.

Tiltak

Søknaden gjeld dispensasjon frå kommuneplanen for etablering av oppdrettsanlegg ved Ytre Raudholmen i Masfjorden kommune. Tiltaket blir liggande i areal avsett til bruk og vern av sjø og vassdrag med tilhøyrande strandsoner.

Bakgrunn for søknad

Erko Seafood AS har to godkjende lokaliteter i indre del av Masfjorden, 13872 Bergsvik og 13873 Barlingebotnen. Disse ligg innanfor terskelen og oksygenmåling har vist at det har vore ei forverring av nivået gjennom dei siste åra i området. Erko Seafood AS ynskjer å flytte ut frå indre del av fjorden og erstatte desse lokalitetane med ein lokalitet i ytre del av kommunen der miljøtilhøva er betre.

Vår rolle

Fiskeristyresmaktene er ansvarlig for forvaltninga av dei levande marine ressursane, fiskerinæringa og kontroll med akvakulturnæringa. Fiskeridirektoratet sine regionar skal ta vare på desse interessene i det regionale og lokale planarbeidet.

Medverknad

Det er viktig at kommunen legg til rette for medverknad frå både fiskeri- og akvakulturnæringa når det gjeld tiltak som kjem i berøring med deira interesseområde. I saker der tiltak ligg i, og i randsona til registrerte fiskeriinteresser, har vi som rutine at vi sender saker til uttale til fiskarlaget for å få saka mest mogeleg opplyst for vår del. Med kort høyringsfrist for oss, er ikkje dette gjennomførbart. Vi kjenner ikkje til om kommunen har send saka på høyring til Fiskarlaget som representerer ei viktig brukargruppe, men føreset at dette er blitt gjort.

Vår vurdering

I samband med innsamling av kystnære fiskeridata har vi har registrert eit gyteområde for torsk ved Raunholmane og eit gytefelt for torsk mellom Haugsøytangen og Dyrøy. I samband med kartlegging av marint biologisk mangfald har HI registrert eit regionalt viktig gytefelt for torsk i Haugdalsosen. I sør er grensa trekt ved Raunøyane og omsluttar mellom anna dei registrerte gyteområda Haugsøytangen og Dyrøy. At gytefelta blir registrert ulikt skuldast ulik metode for registrering.

Fiskeridirektoratet driv kartlegging av gyte- og oppvekstområde for fisk basert på intervju med lokalkjende kystfiskarar. Som del av kartlegging av marint biologisk mangfald, nytter Havforskningsinstituttet Fiskeridirektoratet sin data som grunnlag for sin undersøking av gyteområde for kysttorsk. Kysttorsken er viktig for økosystema langs kysten, og er samstundes grunnlag for ein stor del av kystfiskeria. Det har vore nedgang i bestandane av kysttorsk gjennom fleire år, og situasjonen gjev ifølgje havforskarane framleis grunn til uro.

Vi har og registrert eit område nord for Raunholmane som er brukt til fiske med garn etter torsk, sei og hyse og fiske med not etter makrell. Dette området er også sett av som fiskeområde i kommuneplanen.

Ut frå kartvedlegga til søknaden vil akvakulturanlegget bli lagt sør for Ytre Raunholmen og fortøyingane mot nord vil ikkje gå inn i det registrerte fiskeområdet. Fiskeområda er nytta av både yrkes- og fritidsfiskarar. Dette fører til ein del aktivitet i området i sesongen.

Det er forbod mot ferdsle nærare akvakulturanlegget enn 20 meter og å fiske nærare enn 100 meter målt frå anlegget sitt faktiske ytterpunkt i overflata. Slik anlegget er teikna inn vil det være mogleg for mindre båtar å passere mellom Ytre Raunholmen og anlegget og å fiske tett opp til holmen. Av omsyn til fare for å skade nøter med fiskereiskap bør det ikkje nyttast reiskap som kan sette seg fast i nøtene i området mellom holmen og anlegget.

Søklar har teikna inn eit framlegg til nytt akvakulturområde som er dekkande for anlegget sin omsøkte arealbruk i overflata. Dette er etter vår vurdering for knapt. Dersom det blir aktuelt å legge ut eit nytt akvakulturområde bør det ha større utstrekning i alle retningar. Som minimum omfatte ankringspunkta i ryggen mellom holmane. Dette for å synleggjere arealbruken for andre brukarar og å gje høve til mindre justeringar av anlegget utan at ein må søke dispensasjon frå kommuneplanen.

Miljøtilhøva i indre del av Masfjorden har vore overvaka over lengre tid og sjølv om det er god djupne i fjorden, er det ynskjeleg med mindre belastning av utslepp som kan bli liggande på botnen. Vi vurderer det som positivt at Erko Seafood AS vurderer å flytte drifta til eit meir ope farvatn i Fensfjorden.

Konklusjon

Ut frå vår kjennskap til området, det marine miljø, fiskeriaktivitet og søkjar sitt behov for ny lokalitet, vil ikkje vi gå imot at det blir gjeve dispensasjon for etablering av akvakulturanlegg som omsøkt.

Fiskeridirektoratet si kartløyving

Data om registrerte kystnære fiskeområde, løyve til å drive akvakultur og registrert marint biologisk mangfald finnast i kartløyvinga på Fiskeridirektoratet si heimeside www.fiskeridir.no.

Med helsing

Leni Marie Lisæter
seksjonssjef

Kari Morvik
seniorrådgiver

Brevet er godkjent elektronisk og vert sendt utan handskriven underskrift

Mottakarliste:

Masfjorden kommune Austfjordvegen 2724 5981 MASFJORDNES

Kopi til:

Fiskarlaget Vest Slottsgaten 3 5003 BERGEN

Fylkesmannen i Hordaland Postboks 7310 5020 BERGEN